

Adroddiad i	Awdurdod Tân ac Achub Gogledd Cymru
Dyddiad	20 Ebrill 2026
Swyddog Arweiniol	Justin Evans, Prif Swyddog Tân Cynorthwyol
Swyddog Cyswllt	
Pwnc	Diweddariad ar Brosiect Canolfan Hyfforddi Hwb Awen



PWRPAS YR ADRODDIAD

- 1 I roi diweddariad i'r Aelodau ar gynnydd Prosiect Canolfan Hyfforddi Hwb Awen, gan gynnwys gweithgaredd llywodraethiant, statws y safle, cynllunio ar gyfer cyfathrebu ac ymgysylltu, ac ystyriaethau allanol sy'n dod i'r amlwg.

CRYNODEB GWEITHREDOL

- 2 Mae Prosiect y Ganolfan Hyfforddi, Hwb Awen, yn parhau i wneud cynnydd trwy'r trefniadau llywodraethiant y cytunwyd arnynt, gyda chyfarfod mwyaf diweddar y Bwrdd Prosiect ar 1 Ebrill 2026. Yn dilyn cwblhau'r gwaith o glirio'r safle, mae'r safle bellach wedi dychwelyd i reolaeth Gwasanaeth Tân ac Achub Gogledd Cymru (y Gwasanaeth) ac mae gweithgaredd lliniaru ecolegol wedi ailgychwyn, gan gynnwys rheoli parhaus y Madfallod Dŵr Cribog.
- 3 Mae'r prosiect yn symud ymlaen tuag at Gam 2 RIBA, a fydd yn rhoi mwy o eglurder mewn perthynas â datblygu'r dyluniad, costau a rhaglen a bydd yn llywio cam nesaf y gwaith. Ochr yn ochr â hyn, mae'r gwaith yn parhau i archwilio cyllid allanol ac opsiynau buddsoddi.

ARGYMHELLIAD

- 4 Argymhellir bod yr Aelodau yn:
 - i) **Nodi'r cynnydd sy'n cael ei wneud gyda Phrosiect Canolfan Hyfforddi Hwb Awen.**

CEFNDIR

- 5 Bydd yr Aelodau yn ymwybodol bod y Gwasanaeth yn bwrw ymlaen â'r trefniadau arfaethedig ar gyfer Canolfan Hyfforddi newydd i fynd i'r afael â'r cyfyngiadau a'r risgiau sy'n gysylltiedig â'r ystâd hyfforddi bresennol, nad ydynt bellach yn diwallu anghenion gwasanaeth tân ac achub modern. Mae'r prosiect yn cael ei oruchwylio trwy Fwrdd Prosiect pwrpasol y Ganolfan Hyfforddi, gyda chefnogaeth trefniadau llywodraethiant mewnol sefydledig.

GWYBODAETH

6 Llywodraethiant a Chynnydd y Prosiect

Cyfarfu Bwrdd Prosiect y Ganolfan Hyfforddi (y Bwrdd) ar 1 Ebrill 2026 gan dderbyn y wybodaeth ddiweddaraf am gynnydd y prosiect, cerrig millfir, problemau a risgiau. Fel rhan o'r diweddariad hwn, ystyriodd y Bwrdd ddigwyddiadau iawndal yn deillio o gynnydd yng nghwmpas y prosiect a gytunwyd yn flaenrol gan Awdurdod Tân ac Achub Gogledd Cymru (yr Awdurdod). Mae'r digwyddiadau iawndal hyn wedi'u hadolygu trwy drefniadau llywodraethiant y prosiect a'u cymeradwyo gan y Bwrdd, gan sicrhau bod goblygiadau'r newidiadau i'r cwmpas y cytunwyd arnynt yn cael eu hystyried yn llawn ac yn aros o fewn goddefiannau'r prosiect.

Mae'r prosiect yn parhau i gael ei reoli yn unol â fframwaith RIBA, ac mae gwaith yn mynd rhagddo ar hyn o bryd tuag at Gam 2 RIBA. Bydd y cam hwn yn rhoi mwy o eglurder mewn perthynas â datblygu'r dyluniad, y costau a'r rhaglen, a bydd yn llywio cam nesaf y gwaith a'r adroddiadau i'r Aelodau yn y dyfodol yn unol â'r trefniadau llywodraethiant y cytunwyd arnynt.

7 Statws ac Ecoleg y Safle

Ar ôl cwblhau'r gwaith o glirio'r safle, mae'r safle bellach wedi'i ddychwelyd yn ffurfiol i reolaeth y Gwasanaeth. Ailgychwynnodd gwaith lliniaru ecolegol yr wythnos hon ac mae'n cynnwys parhau i reoli'r Madfallod Dŵr Cribog yn unol â gofynion statudol a'r cynllun rheoli ecolegol y cytunwyd arno. Mae'r gwaith hwn yn cael ei gydlynu ochr yn ochr â rhaglen ehangach y prosiect i leihau'r risg ac osgoi oedi diangen.

8 Yr Anghenion Hyfforddi a'r Risg Sefydliadol

Mae'r Bwrdd yn parhau i gydnabod bod cyfleusterau hyfforddi presennol y Gwasanaeth yn cyflwyno risgiau gweithredol a risgiau diogelu ac nad ydynt yn diwallu anghenion gwasanaeth tân ac achub modern. Mae datblygu Canolfan Hyfforddi newydd yn parhau i fod yn ganolog i fynd i'r afael â'r risgiau hyn ac i gefnogi hyfforddiant diogel, effeithiol a gallu gweithredol yn y dyfodol.

9 Gweithgaredd Cyllido:

Mae Is-grŵp Cyllid pwrpasol yn parhau i archwilio cyllid allanol a chyfleoedd buddsoddi, gan gynnwys ymgysylltu â Llywodraeth Cymru a rhanddeiliaid eraill. Dylai Aelodau nodi bod ansicrwydd o hyd ynglŷn ag amseru ac argaeledd unrhyw gyllid posibl gan Lywodraeth Cymru, gan adlewyrchu'r ffaith bod etholiad ar y gweill a'r posibilrwydd y bydd newidiadau'n digwydd i rolau allweddol y llywodraeth. Cydnabyddir hefyd, ar ôl yr etholiad, y gallai fod cyfnod o oedi tra bod blaenoriaethau cyllido yn cael eu cadarnhau a threfniadau gweinidogol a swyddogol newydd yn cael eu sefydlu. Mae'r ansicrwydd hwn yn cael ei ystyried wrth gynllunio'r prosiect a rheoli risg, a bydd yr Aelodau yn cael eu hysbysu wrth i'r sefyllfa ddod yn gliriach.

10 Cyfathrebu ac Ymgysylltu

Mae cynllunio cyfathrebu yn parhau ochr yn ochr â'r ffrydiau gwaith technegol a llywodraethiant i gefnogi ymgysylltiad clir, cyson ac amserol. Mae deunyddiau cyfathrebu a briffio drafft wedi'u paratoi i gefnogi ymgysylltu strwythuredig ag arweinwyr gwleidyddol cenedlaethol a lleol, gan sicrhau bod rhanddeiliaid yn cael eu hysbysu'n briodol am gyd-destun strategol y Gwasanaeth, materion sy'n dod i'r amlwg ac anghenion yn y dyfodol. Mae'r gweithgaredd hwn yn cael ei gydlynu i sicrhau cydymffurfiaeth â llywodraethiant y prosiect, cysondeb negeseuon a chydymffurfiaeth â didueddrwydd gwleidyddol ac ystyriaethau cyn etholiad.

GOBLYGIADAU

Amcanion Llesiant	Mae'r prosiect yn cefnogi amcanion llesiant y Gwasanaeth trwy wella amgylcheddau hyfforddi, cryfhau gallu'r gweithlu a gwella gwydnwch sefydliadol hirdymor, wrth fynd i'r afael â risgiau sy'n deillio o gyflwr ac addasrwydd y ddarpariaeth hyfforddiant bresennol.
Cyllideb	Nid oes unrhyw gymeradwyaeth gyllidebol ychwanegol yn cael ei geisio trwy'r adroddiad hwn. Bydd goblygiadau ariannol yn cael eu cyflwyno i'w hystyried gan yr Aelodau wrth i'r prosiect ddatblygu ac opsiynau cyllido ddod yn gliriach.
Cyfreithiol	Mae gofynion statudol a rheoleiddiol, gan gynnwys rhwymedigaethau amgylcheddol ac ecolegol, yn parhau i gael eu bodloni. Cymerir cyngor cyfreithiol yn ôl yr angen mewn perthynas ag ystyriaethau llywodraethiant, caffael a chyllido.
Staffio	Nid oes unrhyw oblygiadau staffio uniongyrchol sy'n deillio o'r diweddariad hwn.
Cydraddoldeb / Hawliau Dynol / Y Gymraeg	Mae ystyriaethau cydraddoldeb, hawliau dynol a'r Gymraeg yn parhau i gael eu hymgorffori yn y gwaith o gynllunio'r prosiect a gweithgareddau cyfathrebu.
Risgiau	Mae risgiau allweddol yn parhau i fod o dan reolaeth weithredol trwy drefniadau llywodraethiant sefydledig y prosiect. Mae'r rhain yn cynnwys ansicrwydd ynghylch amseru penderfyniadau cyllid allanol, yn enwedig yng nghyd-destun cylch etholiad Llywodraeth Cymru, dibyniaeth ar raglenni ac oedi posibl sy'n deillio o ffactorau allanol fel ecoleg, a risgiau parhaus sy'n gysylltiedig â chyflwr ac addasrwydd cyfleusterau hyfforddi presennol.